

BERITA HARIAN, RABU, 28 OKTOBER, 1981

# Siswa diingat jangan bodoh2kan orang lain

BANGI, Selasa — Menteri Pembangunan Negara dan Luar Bandar, Encik Sanusi Junid, mengingatkan pelajar-pelajar universiti mengamalkan sikap 'pintu terbuka' sewaktu berhadapan dengan masyarakat setelah tamat pengajian masing-masing.

Menurutnya, mereka tidak harus memperbodoh-bodohkan orang lain dengan mengeneplikan pandangan masyarakat dalam menyelesaikan sesuatu masalah.

"Sikap mempermainkan orang lain dan menganggap diri terlalu pandai sudah tidak sesuai lagi sekarang," katanya ketika merasmikan satu bengkel mengenai pengurusan organisasi di Universiti Kebangsaan Malaysia di sini, hari ini.

## Panduan

Encik Sanusi berkata, pandangan dan idea orang ramai perlu ditimbang atau dijadikan panduan sebelum membuat sesuatu tindakan.

"Pelajar-pelajar yang tamat pengajian masing-masing perlu menjadi pemimpin yang menyelesaikan masalah bukan pengacau yang mencipta masalah," tegasnya.

Jika boleh, kata beliau, mereka harus menjadi seorang pejuang yang bekerja dengan semangat pengorbanan di bidang mereka ceburi.

Kerajaan sendiri, katanya, mengamalkan sikap 'pintu terbuka' termasuk kepada

pensyarah dan pelajar-pelajar universiti.

"Mereka boleh mencurahkan idea dan saranan masing-masing menerusi kertas kerja kepada Perdana Menteri atau Timbalan Perdana Menteri untuk ditimbang.

"Malah saranan itu juga boleh tujukan kepada saya di portfollo pembangunan negara dan luar bandar untuk dinilai dan diambil perhatian," jelasnya.

## Berkuasa

Menteri itu juga memberitahu, ada setengah-setengah pegawai suka berkuasa tetapi tidak suka kerja. "Mereka sering menggunakan perkataan 'jangan' atau 'tidak' sewaktu berbicara atau bermesyuarat," tambahnya.

Dalam pada itu, pegawai tersebut tidak pernah atau enggan mencurahkan idea untuk menggantikan idea orang lain yang ditolak.

"Sikap beginilah yang tidak baik dan bertentangan dengan hasrat Kerajaan Datuk Seri Dr. Mahathir yang inginkan pengurusan bersih, cekap dan berkesan," ujarnya.

Mengenai kecekapan pengurusan sesuatu organisasi, Encik Sanusi menyarankan beberapa perkara yang perlu diberi perhatian.

Antaranya niat baik, perhubungan, penghasilan, maruah organisasi dan pencipta perubahan yang membina.